



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 7

ICC ODI bowlers rankings nung Shaheen Afridi temaba jenjangi tuogo

Biden-i Gaza nung Israel rara anena atatsü ayongzük

VOL. XXI NO. 26 (ADOK 26) DIMAPUR ROGONÜ (FRIDAY) YIMPOKSÜI (NOVEMBER) 03, 2023 ₹ 5.00

## Central scheme indang osang shidak prokshitsü tongtipang

**Dimapur, Yimpoksüi/Nov. 02 (TYO):** Press Information Bureau, Ministry of Information & Broadcasting, Kohima ajanga 'Central Government Initiative/Schemes in Nagaland' omen nung ajemdaker One Day Media Workshop, 'Vartalap' sentong November 2, 2023 nü De Oriental Grand, Kohima nung ayongzüka liasü.

Tongti tesemdanger ka ama Thavaseelan K, Principal Director, Directorate of School Education, Nagaland ajanga iba workshop nung jembidang, nüburtem nem Central Schemes balala asoshi awareness agütsütsü nungdaker, ta ashi.

Sorkar indang scheme balala nüburtem nem metetdaksütsüji sorkar department tem mapa lir, aser Central mesüra state sorkari yangluba scheme nung osangtsüsang, education aser communication ya tongtipang lir, ta ashi.

Nüburtemi timtem balala ajuruba rongnung scheme balala mongutetba tebilemtsü ya ka lir. Scheme balala takok ngua aser mapa kuma inyaktetsü asoshi mezüngbuba nung item scheme agütsü atema awareness agütsütsü ya tongtipang lir, ta Thavaseelan-i ashi.

Iba mapang awareness agütsütsü atema kisung masü saka nüburtem nem osang balala agütsütsü asoshi media shilem tongtipang akumer, ta pai ashi.

Teyari angurtem aser stakeholders tsungta media ya tesendaktep ka amai lir aser

paroki asangsang nung talenba aser tetsükdaksü tem tuteta sayur, ta Principal Director ajanga ashi.

Tesemdanger tongti ka ama iba workshop nung jembidang, nüburtem asoshi Ato Kilonser Narendra Modi-i scheme balala benoka lir, ta Senior Journalist Oken Jeet Sandham-i ashi.

Ajisüaka nübur aikati item scheme indang memetet aser ishihikati dang meteta lir, ta pai sasaba lemsatepa liasü.

Item scheme ya nüburtem asoshi lir aser temsüa aliba nübur ajungai item teyari agütsü temeden lir, ta Sandham-i ashi.

Tim lenmang nungi item scheme agütsü tasak masü aser nüburtemi loan agütsü melena subsidy aliba scheme bushitsüla, ta pai ashi.

Iba sülen technical session nung dorkar department balala nungi shisalen sayurtemi osangbener dang Central sorkar indang scheme aser sentong balala indang angatetdakja liasü.

Principal Chief Conservator of Forest and Wildlife Warden, Government of Nagaland, Vedpal Singh ajanga Forest Conservation (Amendment) Act 2023 indang jembia, Assistant Engineer, Directorate of School Education Nagaland, Sani Pongen-i One Nation One Student ID indang jembia aser Assistant Manager, Ministry of Tourism attached to Tourism Department of Nagaland, Kunal Jha-i Central Initiatives in Tourism Sector in Nagaland indang onük nung jembia liasü.

## Nagaland Emergency Preparedness Exercise takok ngua agiogo



State nung Home Department kübok Nagaland State Disaster Management Authority (NSDMA) ajanga National Disaster Management Authority (NDMA) den lungjemer November 2, 2023 nü Nagaland Emergency Preparedness Exercise (NEPEX) agiba sülen State Emergency Operations Centre, Kezieke, Kohima nung ketdangsürtem osang agitepba senden nung tangokba noksa nung angur.

**Dimapur, Yimpoksüi/Nov. 02 (TYO):** State tesem ajunga nung Home Department kübok Nagaland State Disaster Management Authority (NSDMA) ajanga National Disaster Management Authority (NDMA) den lungjemer November 2, 2023 nü Nagaland Emergency Preparedness Exercise (NEPEX) sentong agia liasü.

Home Commissioner Abhijit Sinha aser Chief Observer and Senior Consultant NDMA, Sudhir Bahl den NSDMA aser department balala nungi ketdangsürtemi district ketdangsürtem den osang agitepba senden ka mena liasü aser State Emergency Operations Centre, Kezieke, Kohima nung osangbener den jembia liasü.

Iba osang agitepba sentong ya Zunheboto, Dimapur, Chümoukedima, Kohima, Tuensang, aser Peren district tem nungi Deputy Commissioners aser ketdangsürtem den video

conference ajanga agia liasü.

Iba mapang district ketdangsür temi parnok tajangshibatem, nisung yiruba, asü-amaba aser mock drill agiba osang lemsatepa liasü. Parnokisa osangtsüsang agitepba mapang metokmeperibatem, telangzüba agütsüdang menuba, logistic tsütsü renloktsü nungdakba aser radio communication majungba indang osang agütsü.

Iba exercise takok ngua agitetsü asoshi stakeholders temi shilem tajung agia liasü ta district ketdangsürtemi ashi.

Parnoki osangtsüsang agiba, volunteers tem yokba aser relief camp den operational center tem nung temolung agütsütsü lemsatepa liasü.

State renema aliba asadangtsü aser metokmeperi jangjatetsü nükjidong nung iba exercise ya agi, ta Abhijit Sinha-i ashi.

Taküm agiba exercise ya taoba küm dang nungi tali tajungba liasü aser maneni

angazütsüla aser osangtsüsang agitepba tsütsü asendenshütsü nungdaker ta pai ashi.

Disaster management atema Thizama, Kohima nung 'state-of-the-art building' yanglutsü sentong lir ta pai metetdaksü.

NDMA-ia alima lendong balala ajangshiba mapang renemshia aliba mera tali renloktsü asoshi bendanga agütsür inyaker, ta Sudhir-i ashi.

Menoknok anokba mapang renemshia alitsü nungdaker ta pai nenshia ashi.

Pai the Emergency Operations Centre (EOC) indang tongtipang shilem rasaa ashi aser automatic response mechanisms nungdaker aser telangzüba agütsürtem tsungta osangtsüsang tajungtuba nung amalitep akatsüla, ta ashi.

Sudhir-i mapang shia mock exercise agütsü kanga tongtipang lir aser mozüki atema disaster management plans shidak nungdaker, ta ashi.

## 14th NLA session tasembuba November 9 nü amentsü

**Dimapur, Yimpoksüi/Nov. 02 (TYO):** Constitution of India indang Article 174 Clause (1) nung mela aliba tashi amshia Fourteenth Nagaland Legislative Assembly indang Third Session (Emergent Session) ya Nagaland Legislative Assembly Hall, Kohima nung November 9, 2023 anepdang 9:30 ako nungi tenzüka amentsü ayongteptsür, ta

Nagaland Angh, La Ganesan-i sangdong ka ajanga metetdaksü.

Iba senden dak sendakba nung Speaker, Nagaland Legislative Assembly aser Chairman, Business Advisory Committee (BAC), Sharingain Longkumer-i Business Advisory Committee (BAC) senden November 4, 2023 anungdang 12:00 ako nungi tenzüka

Committee Room, Assembly Secretariat nung amentsü ayongzükogo.

November 9, 2023 nü nungi tenzüka 14th Nagaland Legislative Assembly indang Third Session (Emergent Session) asoshi Provisional Programme yanglutsü atema senden ya ayongzükur ta sangdong ka ajanga ashi.

## 30th Alongtaki AC nung mapa jenti shidak meinyak: NPCC

**Dimapur, Yimpoksüi/Nov. 02 (TYO):** Public Grievances Department, NPCC ajanga terenlok maparen asoshi senotsü agütsüba meshidaki amshiba magizütsü takhangba kar agüja liasü.

NPCC Public Grievances Department sangdong ajanga ashiba agi, Mokochung district kübok Longchem-Saring lenmang aser apu yanglutsü atema M/s Win Enterprise nem December 22, 2022 nü work order agütsü, kong tender sen 14566329 (One Crore Forty Five Lakhs Sixty Six Thousand Three Hundred and Twenty Nine) liasü.

RTI report ajanga ashiba agi, sen shilem 30 agizükogo - koba sen 4369898 (Forty Three Lakhs

Sixty Nine Thousand Eight Hundred Ninety Eight only/-) alitsü, ajisüaka tang tashi mapa metenzüki lir ta NPCC ajanga ashi.

Lenmang kanga mejungi lir aser gari mesenzüteti kumogo aser 2022 küm shiranger ka mozü kidangi aodang lenmang majungba mechi lendang asüba otsüa lir. Lenmang majungba ajanga gari ya ghonda aika molushi nung songa kazü aser shiranger ya mapang shidak nung mozü kidangi motet. November 1, 2023 nü ang Longchem nungi senso tajung kati pa meyong JCB den sen 20,000 agüja lenmang kanga majungdak atepa liasü, ta ashi.

30 Alongtaki Assembly Constituency nung ambulance

ana alitsü asoshi LADP (COVID-19) scheme 2020-2021 kübok SDPDB ajanga sen lakh 25 mela aser RTI report nung iba maparen temoko ta sayur saka ambulance tasen kata mangur saka Gypsy ka ambulance ama amshir, ta NPCC sangdong ajanga ashi.

Kasa constituency nung LADP 2019-2020 Iconic Scheme kübok Multi-Purpose Hall Phase-I renemba sayur aser iba atema SDPDB ajanga sen lakh 50 melaoko, saka iba ki ya tang tashi mali, ta ashi.

Lakhuni nung sen crore ka agi GHS Building yanglutsü atema phase ana lemsar SDPDB ajanga 2019-2020 küm mezüng sen lakh 50 aser LADP Iconic Scheme kübok DPDB ajanga 2020-2021

nung sen lakh 50 amshitsü mela. RTI report nung verification committee ajanga 'completion certificate' agütsüba sayur saka school ki ya temeimsü tia nung lir, yangji classroom daktang shidak mali aser ki o jen maliba ajanga meyi mapang kaketshir school nung mementeter, kechiaser yangji takdang timba nung kilem mali aser school building ya tang tashi teyangludak lir, ta NPCC sangdong ajanga ashi.

Item mapa dak sendakba nung PGD, NPCC ajanga contractor dang nüburtemi langa aliba ama lenmang yanglutsütsü ajungshir aser kasa mapang ketdangsürtemi nüburtem takum aochia bilemstütsüla aser tekeratiba nung nungdakba mera

agütsü ajungshir ta sangdong ajanga ashi.

Senotsü taila mapa inyaka agizüka agiba atema nüburtem aser lokti tentet balalai meita aotsüla aser mapa shidak inyakdaksütsüla, ta ashi.

Mapa tang ang tenzüker alinung kodaser Verification Committee ajanga 'completion certificate' agütsü? ta PGD, NPCC ajanga asungdang.

Item terenlok mapa inyaktsü asoshi senotsü agütsüba amshiba dak sendakba nung Alongtaki AC nungi MLA, Administration aser verification team ajanga item inyakyim dak sendakba kuli tekeratiba nung nüburtem nem agütsütsüla, ta PGD, NPCC sangdong ajangasa ashi.

### Dimapur aser MKG nung Mock Drill ayongzüka agiogo



(Abelen) November 2 nü Dimapur nung menoknok lendong dak sendakba nung mega mock drill exercise ayongzüka agiba mapang yirur alirtem temang anepalutsü atema anir aoba noksa nung angur. (Achiji) Mokokchung nung November 2 nü NEPEX Mock Exercise agiba mapang SDRF aser Home Guards personnel temi shilem agiba noksa nung angur.

**Dimapur, Yimpoksüi/ November 2 (TYO):** November 2 nü menoknok lendong dak sendakba nung State ajunga nung Mega mock drill exercise ka ayongzüka agiba mapang Dimapur district-a iba mock drill exercise nung shilem agiogo. Menoknok ya 7.1 Richter scale nung anokba ama bilema iba exercise agia liasü.

Dimapur kübok Forest Department Residential Block nung mi lendong ka atalokba ama; Pantaloons nung nisung asem yiruba, asem kanga mejungi yiruba aser ka asüba ama; Dimapur Government College nung nisung asem yirur jaja aoba, asem kanga mejungi yiruba aser ka asüba ama; Government High School, Sarbura nung nisung asem terara yiruba aser asem kanga mejungi yiruba aser ka asüba aser Government Middle (Lotha) School Duncan nung nisung asem kanga mejungi yiruba, pezü terara yiruba aser ka asüba ama bilema mock exercise ayongzüka agia liasü.

Yirur alirtem ya doctor tem aser SDRF team, Dimapur-i anepalua liasü. Yirur alirtem ya kar District Hospital, Dimapur-

i; kar Ayushman Bharat, Health & Wellness Centre UPHC, Duncan Basti aser kar State Stadium Dimapur nung staging area-i anir oa liasü.

Sorkar school ana dak alia Government Middle School Duncan (Ao), Dimapur nungi class 7 aser 8 nung azünger kaketshirtemi iba mock drill nung shilem agia liasü.

Dimapur nung mock exercise kanga takok ngua agiogo, kong line department ajaki teka amteper inyaksangshio.

Mock exercise tembangba sülen DC Dimapur, CP Dimapur, ADC Dimapur, observer tem aser tanga ketdangsürtemi NIC conference hall, DC office Dimapur nung video conference ka nung shilem agia liasü.

November 2 nüsa state ajunga den jangyu medema Mokokchung nunga Mock Drill ka ayongzüka agiogo. 8.6 Magnitude tesashi menoknok ka anokba ama bilema iba drill agia liasü. Iba mock exercise ya nüburtem aser agency balala nem lendong atalokba mapang telangzüba tapet agütsüsü atema mechanism tapet amenoktsü asoshi tangazükba agütsüsü

nükjidong nung ayongzüka agiogo.

Emergency siren ya anepdang 9:3 nung agütsü aser tekümzüka mapren ya Staging Area (Imkongmeren Sports Complex) nungi tenzüka Govt. High School, Dilong, Model Hr. Sec. School, MMC Complex, Jubilee Memorial College aser Vidi Vici Building ta tesem pongu nung iba exercise agia liasü. Item tesemtem nung ki chireper nisungtem kümzüka, mi lendong atalokba aser nüburtem bushia kümzüka aser lenmang merektetba amala inyakyimtem benoka inyaka liasü.

Exercise nung rescue personnel aser Volunteer tem ya NCC, Bharat Scout and Guides, Home Guards, F & ES Team, SDRF, Medical Team, PWD (R&B), Traffic department nungi personnel tem liasü aser documentation (Photography & Videography) atema DPRO Team-ia shilem agia liasü.

Mock exercise ya 12:00 ako nung tembang aser Deputy Commissioner Mokokchung-i anküp o jembia liasü.

### Mokokchung district BJP unit tir tasen shimogo



BJP Mokokchung District tir tasenba S. Bendang Aier (teyong) den party ketdangsürtem November 2 nü BJP Mokokchung District Office nung tangokba noksa nung angur.

**Mokokchung, Yimpoksüi/ November 2 (TYO):** Tawa shimba BJP Mokokchung District tir S. Bendang Aier November 2 nü office mapa agizükogo. BJP Mokokchung District office nung tir mapa agizükba sentong nung party ketdangsürtem aikati shilemagia liasü.

Mapa toktsüba tir Imolemba Jamir-i sentong nung o tatsüka jembiba mapang, taoba küm pezü tashi pa aser külem tenzükertemi tia tensa ajak nung party koda anir ao iba indang

bilemtetshia jembia. Paisa, tir tasenba kübok party takok ngua tejakdangi aotsü imlaja ataba lemsatetpa liasü.

Tir tasenba, S. Bendang Aier shiba BJP Nagaland State Secretary liasü, pai mapa agizükba sülen, party tang tashi takokma nung anir aruba atema mapa toktsürtem nem tenüngsang agüja liasü. Paisa, tali bendanga agütsürshir nüburtem tonga otetsü atema mapa tajung maneni inyaksü BJP Mokokchung ayongzüka liasü.

Maneni pai karyakata ajak

dang, district kübok kibong ajaki tua "Saab ka vikas" osang proktsü ayongzüka, koba Ato Kilonser Narendra Modi kübok BJP sorkar yimyim lir. Paisa, BJP Mokokchung District ya teti ama tashi tait aser ajak atema asütsü, ta ashi.

Iba sentong ya BJP Mokokchung District Vice-President Lanutoshi Longkumer lenisüba nung agi aser Vice President BJP Mokokchung Bendangtoshi Jamir-i Tsüngrem temaotsü meshizüka sarasadema liasü.

### PDADNC-i metetdaksür

**Dimapur, Yimpoksüi/ November 2 (TYO):** Petroleum Dealers' Association Dimapur, Niuland and Chümoukedima (PDADNC)-i sangdong ka ajanga district asemprongla nung November 4 nü Annual Gathering cum Picnic ayongzüka aliba ajanga 12:00 ako tashi Retail Outlets (Pumps) tem shibanga atatsü

ta metetdaksüogo. Association-isa, gari kiburtem dang iba osang ya angaoka ayutsü atema mepeshia metetdaksüogo. Maneni association-isa, retail outlets tasentem dang iba sentong nung shilem agitsü pelashishia jaokogo, ta General Secretary PDADNC Pretso Therie-i sangdong ka ajanga metetdaksü.

### Mokokchung nung 'The Play Café' ta sür café balaka ka lapokogo

**Dimapur, Yimpoksüi/ November 2 (TYO):** 'The Play Café' ta sür tanurtem asayadak (play zone) tesem den ano süngo amtsük tapu balala anguba tesem ka Vov 2 aonung lapokogo. Iba café ya Mokokchung town kübok Aongza ward nung aliba Indian Oil (Mariani road) anasa Tyre Servicing Centre aziük nung lir. Mokokchung Town Baptist Arogo, Associate Pastor, Yanglu Pongen-i iba café meshiteta sarasademtsü. Iba ama play café yabo Mokokchung town nung ibai mezüngbuba asütsü.

Iba café ya Nov 3 nungi tenzüka nikongdang 2:00 ako nungi aonung 7:00 ako tashi lapoktsü. Tanurtem sodi mapang nungbo anepdang 11:00 nungi aonung 7:00 ako tashi lapoktsü, ta café kiburi metetdaksü.

Mokokchung nung tanurtem satoksatoka kazüdak tesem maliba ajiteta ibai nungdaker ta küm ishika nungi nükla-a aliba tanü asangsang nung kü pungmang ka ataloker, ta café kibur Hannah Imchen-i metetdaksü.

Iba café ajanga tanurtem tepela anguba den parnok temang arakzüksü asoshi tesem tajung ka asütsü, aser iba den tsüraburtem asoshia kati ka den

metettepa medemer ayimtsü aser tesendaktep yanglutsü asoshi mapang tajung ka asütsü imlar, ta lai ashi.

Iba café asangsang lapoktetsüsa shirnokisa lenmang balala ajanga yaritepogo, parnok ajak dang kanga pelar, ta laisa tenüngsang agütsü. Iba café ya tajangzük bushiba café ka masü saka nübur nungdak peritsüba café ka südaktsüsü nükjidong nung lapokba lir, ta laisa shisem.

Iba café nung tanur asayadak tapu balala lir, ghonda ka (1 hour) kazütsü atema senpak noklangka (Rs. 100/-) dang agitsü aser ghonda ana (2 hour) nungibo senpak tenem (Rs. 50/-) dang agitsü. Ya-a tzürarterem atema yangji süngo aser juice tajemtsü tapu balala den ice cream aser amtsük ama chiyungtsü tapu balala angutsü.

Iba café ya kari danga birthday party mesüra nungdak balala atema amshinüra mesüra iba dak sentakba nung osang tejangjaba metetnürtemi iba phone No. 9089868226 ajanga kibur den tongteprateptetsü. Iba amala café ya Mokokchung nungbo ya mezüngbuba lira ser tanurtemi jangratema kazütsü, anungji, raktepa or semdangang, nenoki hau asütsü.

### Dimapur nung mejangjaba tasü mang ka nguteta lir

**Dimapur, Yimpoksüi/ November 2 (TYO):** November 1 nü 11 ako shi nung Police Control, Dimapur-i, Flyover foot path nung nisung ka süjia orr aliba indang osang ka angazüka liasü.

Osang dak ajemdaker East PS duty party iba tesemi aritepa ao aser arishi küm 55 nungi 60 tsüngda asütsü ta bilemba tebur ka süjia orr lia nguteta liasü. Iba sülen nisungba ya temang anepalutsü atema District Hospital-i anir ao.

November 2 nü anepdang 7 ako shi nung District Hospital nungi iba nisungba ya temang anepalua aliba mapang 5 ako shi nung asüba indang osang agüja liasü.

Iba sülen duty party mozükidangi ao aser nisungba

ya male ward nung sür liasü. Mozükidang nurse aser tenük kuli agütsürtemi ashiba agi, nisungba ya Pneumonia aser chiyongtsü shitak machiba agi asüba liasü.

Temzüng ozüing kübok ken o bushisingdangba aser mozüki nungi discharge slip o death certificate agizükba sülen tasü mang ya maitsü jangjatsü atema District Hospital morgue-i benerogo.

Asüsang yagi aut sentsü T-shirt ka aser anüngsentsü half pant ka semer liasü.

Iba dak sendakba nung asüsanger kinunger aser medemerterem dang East Police Station, Dimapur Officer-in-Charge (Mobile No. 7085055020) den tongteprateptsü mepeshia metetdaksüogo.

### Dimapur District DP&DB senden Nov 7 nü amentsü

**Dimapur, Yimpoksüi/ November 2 (TYO):** November ita atema Dimapur district, District Planning and Development Board senden November 7 nü 11:00 ako nungi tenzüka DC Conference Hall, Dimapur nung amentsü ta

Dimapur, DC aser DPDB Vice Chairman Dr. Tinojongshi Chang, NCS-i sangdong ka ajanga metetdaksüogo.

Iba senden nung züngsem ajak tamakok maludaktsüü arua shilem agitsü asoshi DC-isa metetdaksüogo.



November 02, 2023 nü Kolkata nung All Bengal Minority Youth Federation nungi züngsemtemi Palestine nunger pusema yimdong süa jajadang tangokba noksa nung angur.

### Congress ya oshimashi party ka lir: Amit Shah

**Karnal, November 02 (Agencies):** Brihostibarnü Union Home Minister, Amit Shah-i, Congress party ya senotsü katiba, commission agiba aser ochimashi party lir, ta aitsü.

Amit Shah-isa opposition INDIA teloktep aija, peipei tebilebatem ataloktsü atema party 27 longjemogo, ta ashi.

Ano külen BJP-ibo nüburtem ajungtsü atema dang inyaker, ta pai ashi.

Haryana sorkari Karnal nung ayongzükba "Antyodaya Sammelan" sentong nung jembidang Shah-i chief minister Manohar Lal Khattar-i aniba sorkari state nung lenla ajak tsütsü terenlok atema inyaker, ta tenüngsang agütsü.

Haryana nung tesüiba küm 9 tsüngda BJP sorkari

ochimashi aser kinünger tejak repranga inyakba anentsüba den külemi tensa tajungba kümdaktsüogo, ta pai ashi.

Narendra Modi-i aniba sorkari inyakba mapa balala metetdakja Union minister-i nüburtem dang sangküm Lok Sabha election nung BJP nem vote agüjang, ta mepishi.

Kasa sentong nung Shah-i 'Antyodaya' kibongtem atema scheme pongu tenzüksü.

Haryana nung Congress lenir Bhupinder Hooda aija Shah-i, "Ni (Bhupinder) Hooda dang ya asüngdangner- tesüiba küm 9 tsüngda terenlok mapatem ya nai angur asü mangur? Mesüra na tang tashi tenük tapok asü?" ta asüngdang.

Shah-i, Congress-i Haryana aser linük naprongla nung

tenrelok mapa meinyak, ta ashi.

"Congress ya sen katiba, commission agiba aser ochimashi party ka lir. Party indang tekaji (Congress election temaitsü) Haryana nunger ket nung mali," ta pai ashi.

INDIA teloktep aija Shah-i, "Opposition teloktep nung aliba party 27 pronglaji kibongi senmanga yimsüsürtem lir. Party kari par jabsotem atema inyaker, kari par jabsaso Ato kilonser kümdaktsüner, kari pei jabsaso agency matsüngdang nungi kümzükner aser kari pei jabsaso chief minister kümdaktsüner. Karbo madam (Sonia Gandhi) tenzükertem akümtsü. Item ama nisungtem jagi nüburtem atema langka tajung karbo inyaksü asü?," ta asüngdang.

### Bihar nung rong meküpbba lendong nung nisung ana asü aser 11 sama

**Patna, November 02 (Agencies):** Brihostibar aonung Bihar kübok Saran district nung Sarya ayong nung rong ka meküpbba lendong nung nisung ana asü aser 11 samaogo; iba rong nungji nisung 18 mena liasü, ta osang ka ajanga metetdaksü.

Tang nisung pongu treatment agidar aser iba lendong nung samartemji tang tebushidak; nisung 9 bo tzüküm tashi tzü wadanga aruteta liasü

aser tetsür ana tasü mang tzü telung nungi agitetogo, ta ketdangsertemi metetdaksü.

Iba lendong nung samartemji tasü mang dang angutsüa akok, ajisüaka samar alirtemji aonung piyong bushitsü, ta ketdangsertemi metetdaksü.

Iba tesem nungji alir kati, "Iba rong nungji nisung 18 mena liasü saka ayong nung tzü tashi tulu ajanga rongji meküpbba lendong nung nisung ana asü, nisung 5-6 shi treatment agidar

aser nisung 11 samaogo. Rescue teams aser lisopurtemi parnok bushidar," ta metetdaksü.

Saran District Magistrate, Aman Samir-i, rong lendongji Brihostibar aonung 6:30 ako meta atalok, ta metetdaksü.

September 14, 2023 nüa Bihar kübok Muzaffarpur district nung aliba Bagmati ayong nung rong ka meküpbba lendong nung tanur 15 dak tema asü.



November 02, 2023 nü Patna nung Bihar Chief Minister Nitish Kumar aser Communist Party of India (CPI) General Secretary, D. Raja na 'BJP Hatao Desh Bachao' rally nung adendang tangokba noksa nung angur.

### India nungertemi visa meliaka Thailand semdangtetsü: Thai Tourism

**New Delhi, November 02 (Agencies):** Taküm November 10 nungi tenzüka sangküm May 24 tsüngda India nungertemi visa meliaka Thailand semdangtetsü aser anogo 30 tashi mongtetsü, ta Thai Tourism ajanga metetdaksü.

Thailand linüki India aser Taiwan na nung raliwalirtem puadaktsütsü nükjidong nung linük ana sensotem nem iba maongka agütsür. Taoba ita (September) Thailand-i China nunger sensotem atema-a kasa maongka ya agüja liasü.

India sorkar data ajanga

ashiba agi, küm ana tashi (2020-21) coronavirus wara ajanga kechalenia mouteti aliba sülen yaküm India nunger aikati linük balala semdangogo.

Tourism ministry-i ashiba agi, yaküm India nungertemi kanga sapua semdangba linük 10 ji - UAE (India nunger lakh 59-i semdang); Saudi Arabia (lakh 24); USA (lakh 17); Singapore (lakh 9.9); Thailand (lakh 9.3); UK (lakh 9.2); Qatar (lakh 8.7); Kuwait lakh 8.3); Canada (lakh 7.7) aser India nunger lakh 7.2-i Oman semdanga liasü.

### ED matsüngdangi maoba atema BJP-i Arvind Kejriwal aitsür



November 02, 2023 nü Rajghat, New Delhi nung Delhi BJP Tir, Virendra Sachdeva, Harsh Vardhan aser Vijay Goel nunger densema party lenirtemi Delhi Chief Minister, Arvind Kejriwal anema longkak aitdang tangokba noksa nung angur.

**New Delhi, Yimpoksüi/ November 02 (Agencies):** Delhi excise policy ochimashi ken o dak sendakba nung Brihostibarnü Enforcement Directorate (ED)-i Delhi Chief Minister, Arvind Kejriwal jaoka liasü saka pai maoba atema BJP-i pa sashia aitsüogo.

BJP-i, Kejriwal-i ED matsüngdang nungi ajener aser ochi majuruner ta aitsü; ano külen AAP-ia, yimtenren tsütsü nungi ED-i Kejriwal jaoker, ta aitsü.

Brihostibarnü BJP Delhi unit-ia Rajghat nung longkak aita excise policy ochimashi ken o nung ajemdaker Kejriwal-i CM menden toktsütsüla, ta takhangba agütsü.

Osangbenertem den jembidang BJP otongdar, Sambit Patra-i, "Arvind Kejriwal-i ED-i jaokba nungi ajener. Pai ochi majuruner. Delhi excise policy ochimashi ken o nung chubai (Kejriwal) pasasa pai iba ochimashi nung shilem agia lir ta agizüker," ta ashi.

Sambit Patra-isa, ochi aser kulitem nung ajemdaker ED-i Kejriwal jaok, saka pai asüngdangyaba nungi ajener, kechiyong pai ochi meteta lir, ta ashi.

"ED-i tapi agibo shinga mejaoker. Kuli kar aliba ajanga dang ED mesüra tanga agency-i Kejriwal jaoker ta onoki amanger," ta paisa ashi.

Ano külen Aam Aadmi Party-ibo, Enforcement Directorate-i Kejriwal jaokba ya yimtenren tsütsülen nungi

asalentong kar alitsüa akok, ta ashi.

AAP-isa, metetsümonga opposition lenirtem anema inyaker, ta ashi.

Osangbenertem senden ka nung AAP lenir, Saurabh Bharadwaj-i, "Tanü Delhi chief minister dang ED matsüngdangi arung ta jaoka liasü. Pai shidi ajanga ED dang, kechi kuli nung ajemdaker pa jaokerar tejaokba shidi nungji tejangja shia mali; kulisür ka ama asü melung melemteti jaoker, nija ka ama jaoker asü, chief minister ka ama mesüra AAP national convener ka ama jaokerar shia mali, ta shiogo," ta metetdaksü.

"Kechiba interview kar nung BJP MP, Manoj Tiwari-i Kejriwal aputsü ta jembü? Iba tetezüji yimtenren tsütsü asalentong kar lir. State pongu nung elections agitsü lir aser national convener, Kejriwal-i nüboyimtsü atema aotsüsa akümer," ta AAP lenir aser Delhi nung cabinet minister, Saurabh Bharadwaj-sa metetdaksü.

AAP Delhi state convener, Gopal Rai-ia BJP dang bushisüngdanga agency balala tim masüba nung amshiba ya anentsüla, ta ashi.

Brihostibarnep Kejriwal, Madhya Pradesh kübok Singrauli-i oa Punjab Chief Minister Bhagwant Mann den külemi election nüboyim dak sendakba road show ka nung shilem agia liasü.

Tan ita Madhya Pradesh nung assembly election agitsü.



## TIR YIMYIM YIMOBILEM (EDITORIAL)

DIMAPUR ROGONÜ, YIMPOKSÜI (YIMPOKSÜI) 03, 2023

### Bangladesh den tesendaktep

**B**angladesh ta asüdang asenoki asen lima nung arua ayangertemang jet ta temulungi arur. Aji oda, asen lima nung bendangertem nungpoka aruagi sensosangertem dangbo nütsüng teimba küma aliba tebilemtsü indang jembidanga, tangar bendangertema lir, saka asenoki Bangladesh nungertem dak dang rangloker. Atangji, asen lima ajaklen Bangladesh nungi arurtem alitsüa akok, ajisüaka parnokji talidak bushia aruba masü saka asenoki asen mapa inyaksü jaokba purtem lir, anungji asenoki parnok nem mapa magütsüra parnok odang oadoktsü. Iba tiaji kodang bilemdangdir, asenok aliba agi Bangladesh nunger alir masü saka Bangladesh nunger aliba agiang asenok kiojen yanglutetter aser terenlok mapatem inyakba nunga nübo peria angur, anungji parnok aliba agiang asenok alir amai kümogo. Bangladesh nunger otsü yaa asenok Naga nunger otsü amato alima aika nung sükshia aliba kin ka lir. Aji oda, tamasabo Pakistan lima asüba nungi India-i yaria East Pakistan agi Bangladesh kümer 1971 küm laa alima nung kin balaka akümba otsüji Nagaland danga tanutsü aser tanubu otsü lir. Iba otsüji bilemteta yakanü Bangladesh Air Force purtem Dimapur-i aruagi Bangladesh Air Force ya 1971 küm Pakistan den raraba mapang Dimapur nung tentetba mung amungba angshidang, Bangladesh-ji Nagaland den sentaktepba otsü tasen aser tajung ka angazükogo. Atangji, Bangladesh oshi Bangla jembirtem India nunga West Bengal, Tripura aser Assam nung lir. India nungbo Bangla dang Bengali ta ajar. Aji oda, oshi kasa süaka Bangladesh nung alirtem dang Bangla aser India nung alirtem dang Bengali nunger ta ajar. Ibayongji, Bangladesh nung alirtem India nung aruagi Bengali oshi jembia melamelaa senso küma liteter. Ibajiang asenok asoshi shisabolutsüka lir. Ibaji meteta asenoki parnokji amshira parnok den tesendaktep tajung ayubaji asenokang tajangzük tuluba angutsü. Tanga bilemdangdi süra Bangla oshi jembir maden asenoki gari lenmang tatsükata meyanglutettsü, ki tulu aser tajunga meyanglutettsü aser tesem aika nung asenok kijaibo alu meyimtet endoktsü. Asenoki o agibo asen kijai ajak inyaktettsü ama jembitsüa akok saka mapa nung yamaji masü, asenok asoshi mapa inyaker nungdaker, kechiyong asenoki mapa inyak mashiba dang masü saka mapa inyak ashiyonga nübo nungdaker. Iba ama tensa tia ka nung asenok tang aser tarutsü nung bendangertem nem yimten aser lokti mamoksepdaktsüi senso purtem o bendangertem na bendangteta alitsü atema Nagaland nung ILP ama özüng ya akangshitsüla aser Nagaland nung senso register, Register of Indigenous Inhabitants of Nagaland alitsüla. Tanübo asenoki asen lima amokbangba ya Bangladesh nungi arurtemi amokseper amai bilemer, kechiyong asenok mapa inyakdak ajak nung parnok lir aser town ajak nung dokan-a parnok teimba angur. Ajisüaka, parnokki dang asenok amokseper masü saka tangar bendangertem aika India state balala nungi arurtem lir. Parnoki asenok kiojen meyanglur, asen mapa nung parnok ayanger masü, gari lenmang yangludaka parnokki mangutsü, saka parnok jagi Nagaland tenung nung business tulu inyaker. Nagaland senji parnok ket nung lir aser Nagaland nung chiyongtsü aser tagitarutsü ajak parnok nungi arur. Aji oda, pei tsürabur mapang nungi tanü tashi government department karbo parnok ket nung lir. Itemjiang asenok asoshi tekümdangtsü tuluba lir. Item ajakji meteta kodang asenoki kiyonger lima Bangladesh ama den yimten aser business lenmang nung putepa lidir, asen lima akaba süngotsü aser long dena Bangladesh-i alitsü. Tangbo joko Agartala nungi Kolkata-i train nung Bangladesh ajanga aotsü. Kasaji Assam nung akaba ayong tulutem ajanga Bangladesh-i rong nung asenoki oset tapu aika yoktettsü. Tangar dang nungi item tajangzüktemji agitettsüa asenoka jetperaa alitsü kanga nungdaker.

## OLEMSABANG

### Tsüngrem tenzüker aser arogopurtem atema tekümdangtsü

~ L. Kika Pongener.

Tsüngremi alima nung pa yimli ka yanglutsü, küm noklang aika jilia Nebukadnezzar chuba dang mangdang sayu. Daniel-2:31-35 nungji züngra...Nebukadnezzar pongmang nung sungyanglu tulu ka angu...Iba sungyanglu dakji, teka medeni angentetba lung kati aon, aser sungyangluji anuka ajasaa ao. Saka sungyanglu tsükreptsüba lung-ji tenem tulu ka aküm aser alima rangben asüng...Iba pongmang nung sungyanglu-ji alima chuba yimlitem aser sungyanglu tsükreptsüba, teka medeni angentetba 'lung'-ji Yisu Khrista indang sayuba, aser Yisu alimai arur, pai alima nung Tsüngrem yimli ka tenzüksü, aser iba yimli jagi alima yimlitem ajak akoktsüba, aser alima ajunga ayimsunga aotsüba indang sayuba sudi...ta rajema angateter. Atangji, Yisu-i bener aruba osangtajung aser Tsüngrem'er yimli 'arogo' agi alima ajunga ayimsunga odagi. Ano tasen lai nung züngra, Yisu-i ashi... "Iba 'lung' manung ni kü arogo yanglutsü" (Mathi-16:18). Anungji tejen lai aser tasen lai anaprongla nung shia aliba jagi... 'Lung' ya Yisu Khrista indang jembiba...ta angateter. Atangji alima nung Tsüngrem'er yimli 'arogo' tenzüksüba ya küm noklang aika jilia shina akaba, aser Yisu-i nutsüngtem dang shina jembir aliba mapa ka atalokba...ta laishiba nungji tejangja angur. Anungji arogo ya nisung'er shisatsü agi yangluba lokti-tentet ka masü, saka Yisu Khrista 'Kinuk-lung' (Foundation) sur, Pa dak amendaker yangerba lokti-tentet ka...ta angateter.


Anungji arogo ya Yisu Khrista temang nung tenuk-telen ka lir. Tsüngrem oi ashir... "Arogoji Pa (Yisu Khrista) temang aser shibai ajak nung ajak sungdaktsür pa tabensabaji arogo" (Efesa-1:23). "Aji oda, Kristai arogoji mesur aser anepalur; Kechiaser asenok pa mang tenuk-len lir" (Efesa-5:30). Anungji shibai/shirnoki arogo timtemtsüsa, mesura arogo nung mepetmesu aser telemsa adoktsüsa inyakdir aser sentong atongdir...Pa/la-bo memerenshi-i malitsü, kechiyong Khristar arogo timtemdaktsübaji, Yisu Khrista temang nung timtemdaktsür...ta angatetdi. Yisui shiogo, "Iba 'lung' manung shiba tsükdir pa anuka raksatsü, saka shiba dak iba 'lung' ya tsükdir, ibajagi pa aoyi küma menungsatsü" (Mathi-21:44). Aji oda, shibai/shirnoki Yisu Khrista kinuk-lung (Foundation) sur, pa dak amendaker yangerba arogo ka timtemdaktsüdir aser telemsa adokdaktsüdir, pa/la-bo khuret tulu asütsü. Asenoki Hindu/Muslim/Communist lima nung Khristan-tem aser arogo reshikangshiba otsü jembir. Tanü India lima nunga Tsüngrem lartem aser Khristan-tem reshikangshiba aser tepsetba, tenlaki amakba aser raksatsüba indang Social Media nung angur. Ajisuaka, asen lima nunga, Khristan tajungtemi, Khristar arogo timtemtsüsa, mepetmesu aser telemsa adokdaktsütsüsa nungsen jembiba aser tashiyim agi tapu-tapu inyakba angur.

Asenok nisunger tenuk asüngtsü kecha maka...Asenoki Tsüngrem tenzükertem dak nungia tajung-tajung dang yimlar...Tsüngrem o tsüngro songa jembitetba, ken atentsü sempet tajung aketba, jera-pera, wainshin, awashi metetba, aser mapa ajak nung tetangshi asütsüla. Ajisuaka, Tsüngremi nisung ka nem item sempet ajakjibo melemzüktsütsü sudi. Anungji sempet tajung kar lira, ibajagi tenuk asüngtsüla aser tashimait kar lira itemji tajunglen agi angatettsüla. Tanü arogopur karibo Tsüngrem tenzükertem tashimaitba-bo ajem ammer kishia bushir, saka parnok dang tajung inyaksübo mereprangteter. Asenoki parnok dak nungi tajung dang yimlaba amaji, parnok tepok sunga itasen/taa agütsütsüla.

*(Maneni asüng adok nung...)*

**Iba Olemsabang nung lemsaba ken-o aser shisatsü ya iba ocet züluri  
bilemba ken-o ama tazünger angateta agitsü mepishir**

# ICC-i 2023 küm indang 'Persecutor of the Year' report sayaogo



## Washington, Yimpoksüi/ November 02 (Agencies):

International Christian Concern (ICC)-i '2023 Persecutors of the Year' report sayaogo; tapak 88 aliba report nungji alima tesem balala nung Khristantem amokmerenba, reshikangshiba, tepuokdak ayuba aser tepsetba linüktem, teloktem aser nijatem osang tejangja metetdakja lir.

Tang alima tesem balala nung reshikangshi ajangshiba Khristan million 200 nungi million 300 shi lir aser ICC-i lenla asem- teyari, mapatong aser awareness agütsüba ajanga parnok yarir.

ICC Tir, Jeff King-i, "Khristantem tepuokdak ayurtem, reshikangshirtem aser tepsetertem anema inyaksü asoshi anüolen aliba linüktem aser yimsüsürtem ajungmesotsü atema onoki iba report nung temenen mapa inyakerem indang shia lir. 2023 Persecutors of the Year Report ya denomination balala nungi Khristantem ajak nungitsü aser yaritsü atema adokba dang masü saka Tsüngremi agütsüba yimsü temeden mangurtem-a ajak yaritsü atema lir," ta ashi.

Jeff King-isa taküm Pakistan kübok Jaranwala jila nung Muslim yimsü alia amanger nisung 5,000 dak temai Tenla ki 20 dak tema raksatsüba aser Khristantem meyong ki noklang aika raksatsüba indang metetdaksü.

Nigeria nunga tesüiba küm 20 tsüngda yimsü alia amanger Muslim nungertemi Khristan meyirjang aika tepsetogo; küm 20 tsüngda Nigeria nung Khristan million 1 shi tepseter asütsüa akok, ta paisa metetdaksü.

Taküm March 4 nungi July 6 tashi nung (ita 4) Nigeria nung tatalokba 55 nung Khristan 500 dak tema tepsetogo, ta pai metetdaksü.

"Persecutors of the Year" report ya November 1, 2023 nü saya.

Iba report nung Khristantem tamajungtiba reshikangshiba linük terji Nigeria, North Korea, India, Iran, China, Pakistan, Eritrea, Algeria, Indonesia aser Azerbaijan linüktem lir. Iba 'list' nung linük tasen anaji Eritrea

asir Azerbaijan na lir.

"August 16, 2023 nü Pakistan nung Tenla kitem amakba anema August 20 nü Islamabad nung Khristantemi longkak aita ochi temeden takhangba agütsü. Khristantem reshikangshiba linük tamajungtiba 10 rongnung Pakistan densema lir," ta report nung shia lir.

Pakistan nung Punjab province kübok Jaranwala nung Muslim nungertemi longkak aita Tenla ki 20 dak tema raksatsü aser Khristantem meyong ki 300 shi rongdokja liasü.

Khristantemi Muslim nungertemi temeshi kaket 'Quran' raksatsü, ta tai tonglokja August 16 Muslim nungertemi Khristantem anema apusoa liasü.

Jeff King-i, "Alima tesem balala nung Yisu sülen anidakba agi asen adianu aser aianutsürtem tepuokdak ayur mesüra tepseter. Tangar den Khristan yimsü lemsateptsü atema ozüng agi memelar, iba denji külemi anti-conversion ozüng aser Tsüngrem atalaba ozüngtem nung ajemdaker Khristantem nem tiyazü nung tai tongloksür," ta metetdaksü.

2023 Persecutors of the Year Report nungji ICC-i Khristantem anema inyakba linük tamajungtibatem, nijatem aser teloktem metetdakja lir.

2023 report nungji Khristantem anema inyakba linük tamajungtiba ter rongnung Nigeria, North Korea aser India densema linük aika lir.

Khristantem anema inyakba telok tamajungtiba ter rongnung Allied Democratic Forces, Al-Shabab, Fulani Militants, Sahel kiralongrar teloktem, Taliban aser Tatmadaw (Burmese Army) densema lir.

Khristantem anema inyakba nijatem rongnung Uttar Pradesh Chief Minister Yogi Adityanath, China Tir Xi Jinping aser North Korea yimsüsür Kim Jong Un nungertemi densema lir.

ICC team-i asadangba tsütsü mongintem, bendanger mongintem aser tesem balala nung inyaker ICC staff tem ajanga iba report ya renema liasü.

International Christian

Concern (ICC)-i Protestant, Catholic, Baptists aser Orthodox densema denomination balala nungi reshikangshi ajangshiba Khristantem ajak yarir.

"Lai tesayuba nungi tangatetba balala süaka item ama tamajung mapang nungbo Khrista dang 'Chuba' ta ajar ajak ka küma longjemtsüla," ta Jeff King-i ashi.

Iba report tejangja azüngba ajanga tazüngertemi aser Arogotemi alima tesem balala nung Khristan adianutem reshikangshiba tia junga angatetsü aser iba report amshia yimsü temeden atema inyaksü onoki imlar, ta ICC-i metetdaksü.

1995 küm nungi tenzüka ICC-i alima tesem balala nung reshikangshi ajangshiba Khristantem lenla balala ajanga yaria arudar.

ICC aliba ya reshikangshi ajangshiba Khristantem zübo anepalutsütsü aser alima tesem balala nung Arogo yangertsü atema lir, ta Jeff King-isa metetdaksü.

# ANOGO ABEN TSÜNGREM DEN

## Yakob Tsüngrem

T.ken 146:1-6

"Shiba pei teyari asoshi Yakob Tsüngrem lir, shiba teimla Kibuba pa Tsüngrem dak lir, tepelatsü" (t.5). Iba yagi tanü aser asüng asen nüngdak ajakji Tsüngrem lir ta ashir. Kodang nai Tsüngrem metetter, na tepela kar, teimla aser teyari kar: Pa den jajaba nung tepela, tanü tebilemetsü khuret abener asoshi teyari aser tarutsü asoshi bilemba nung teimla. Talila nai kechi aginer ?

Yakob Tsüngremji shiba? Mezüngbuba, Paji teyanglur. Tekong 6 ashir, Pa, "shibai anüng aser ali yanglu, tzüyim aser item nung aliba ajak; shibai atangji teti ayur" Iba lima yanglua taküm lidaktsütsüsa uluba nung teperi shisatsü teperi aser tashi teperi pa lir. Pai tanü asen tebilemetsü ajak nung yarir.

Tanabuba, " Pa obendanger, shibai tajemreper nem ochi agütsür" (t.7). Kodang nai tai makaba nung aitsür, Tsüngremi metet. Obendangbaji pa nem yujang. Tsüngremi dang raratsü akokba nung ne mapang teindok. Pa nübur ajak den Pa dena lir, aser Pai kechi shidak aji inyaksü.

Tasembuba, Paji Tebu lir. Tekong 7 nung tebuti ayabatem mesüba noksa agütsür. Tsüngrem o-l teti asenok dang Pa temoatsü tejangja sayur. "Aser kü Tsüngremi Kibuba Yisu Khrista nung Pa sentsüwangshi nung Pa rongsen yari nenok tenüngdaksü ajak agütsütsü" (Fil.4:19).

Pezü, Pa teküzmzüker. "Kibubai puoka alirtem nem nüji agütsür. Kibubai tenük tapoktem lapoktsür... Kibubai temeshipur meimer" (t.7,8).

Tatamsa, pa chuba. "Kibubai teti chubatsü" (t.10). Ken ken nai bilemetsü, "Ni iba ama chuba ka akatsü metemtsü. "aji shitak, saka Pa Yakob Tsüngrem lir. Yakobi metsüdak, aser aibelen, saka Tsüngremi Pa Tsüngrem ama ali. Tatem maka Tsüngremji asen jenokdak lir.

Tsüngremji ne jenokdak tulutiba lir. Saka odangbo na mejenokdaksür; Pai na asoshi tashi agütsür aser na tashi itdaksür. Yakob Tsüngremji ne Tsüngrem asü? Yamaji süra, Pa dang jaang aser Pai na yaritsü.

# NSCN/GPRN (Niki) teloki Naga National Prayer Day mongogo

## Dimapur, Yimpoksüi/ November 02 (TYO):

October 31, 2023 nü Ministry of Religious Affairs (MRA), NSCN/GPRN-i Sumi Baptist Church, Purana Bazaar, Dimapur nung Naga National Prayer Day ayongzüka mongogo, ta MRA-i sangdong ka nung metetdaksü.

Tsüngrem dang tatok meshia Naga linük, linük lenirtem aser

nüburtem atema temoatsü aser Tsüngrem leniba meshia lumia sarasadem agia liasü, ta MRA-i metetdaksü.

Tir, Ato Kilonser aser tongti ketdangsertem leniba nung civil aser sepai naprongla nungi linük tenzüker noklang aikati sarasadem sentong nung shilem agiogo.

MRA-i ayongzüka sentong denji külemi kasa anogo aser

kasa mapang nung NSCN/GPRN region 24 prongla nunga Naga linük tenzükertemi sarasadema mongogo.

Dimapur nung ayongzüka sarasadem sentongji Emmanuel Prayer Centre nung director, staff aser counsellor tem leniba nung agi. Parnokisa Laishiba nungi tanela chiyungtsü lemsatepa liasü, ta kasa sangdong ajangasa metetdaksü.



Navi Mumbai, November 02, 2023: Brihostibarnü Navi Mumbai nung All Souls' Day anogomong nung Khristantemi leper semdanga asürtem atema sarasademtsüba noksa nung angur.

AO OSHI ANGAZÜKDAK:

TANÜ ANGAZÜKTSÜBA OJANG



Sayang

(v) tajung süaka tamajung süaka inyakadokba ( done badly or fairly)

\* Tanur tamajungi tsürabur timtemtsüsa sayanga toktsür.

Sayatenya

(n) tetsümgangtsü balaka atalokba (miracle)

\* Yisui sayatenya mapa jenti inyak.

OLONG PAITEP # 6684

Grid for OLONG PAITEP # 6684 with numbers 1-15 placed in specific cells.

TIPILEN and LANGTSÜNGLEN lists for OLONG PAITEP # 6684.

OLONG PAITEP # 6683 TELANGZÜBA

TIPILEN and LANGTSÜNGLEN lists for OLONG PAITEP # 6683 TELANGZÜBA.

Kohima Town GB Union ketdangpurtem shimogo



Kohima, Yimpoksüi/ November 2 (TYO): Kohima Town GB Union-i, 2023-2028 tenur atema ketdangpur tasentem shimogo. Team tassenba ya Ketoulelie Dzüvichü tir sür inyaksangshitsü, kong Nitovi Swu - vice president, Abraham Semy - general secretary, Medochülie Khezhe - joint secretary, Ruokuovilhou Belho - treasurer, Videho Lüho - finance secretary, Keyielie Miachie-o - information and publicity secretary aser Visalie Kelio - advisor densema lir. Team tassenba atema election ya October 28 nü G.B Union Hall, Daklane, Kohima Town nung inti senden amenba mapang agia liasü. Union vice president Visalie Kelio lenisüba nung iba senden amen aser general secretary Toulie Dzüvichü aser treasurer Adelie Suohu nati tezülur aser senyur osang agüja liasü.

Assam sorkari kaketshir 35,775 nem scooter agütsütsü

Guwahati, Yimpoksüi/ November 2 (Agencies): Assam nung Higher Secondary (HS) tatidang nung takok anguba kaketshir 35,775 nem Dr Banikanta Kakati Award scheme kübok November 30 nü scooter agütsütsü. Iba scheme asoshi cabinet-i Bodhbarnü temelaba agütsüo.

"Kaketshir 35,775 rongnung tetsür 30,209 aser tebur kaketshir 5,566 densema lir. Assam Higher Secondary Education Council (AHSEC)-i achaayanga agiba HS tatidang nung tebur kaketshir shirnoki 75 per cent aser tema aser tetsür kaketshir shirnoki 60 per cent aser tema nguogo parnok nem scooter agütsütsü," ta PHE aser tourism Minister Jayanta Mallabaruah-i cabinet senden amenba sülen osangbenertem dang ashi.

"Kasaji Board of Secondary Education Assam (SEBA)-i achaayanga agiba High School Leaving Certificate (HSLC) tatidang nung 75 per cent aser tema anguba kaketshir 27,183 nem Anundoram Boroo ah Award Scheme kübok November 29 nü 15,000 agütsütsü," ta Baruah-i ashi.

Cabinet-isa, Jal Jivan Mission (JJM) kübok public water supply scheme ka nung minor minerals amshiba mapang forest royalty total project cost shilem 0.6 dang agitsü latettsüo.

Kasa mapang nung Assam Cabinet-i Bodhbarnü, medical college tem nung ajak nem kasa maongka agütsütsü atema Medical Colleges and Dental Colleges of Assam (Regulation of Admission into 1st year MBBS/BDS courses) Rule, 2017(as amended in

2023) amend asütsü asoshi temelaba agütsüo.

Iba amendment kübok küm ka atema bod sen lakh 30 non-compliance atema Assam government nem compensation ama agütsütsü latettsüo.

"MBBS menden talila asem Royal Government of Bhutan atema mekazütsütsü. Nalbari Medical College nung menden ana aser FAAMC, Barpeta nung menden ka mekazütsütsü," ta Baruah-i ashi.

Cabinet-isa, Assam Private Security Agencies Rules, 2023 agizükogo.

Iba Rule ya modern technology bendenloktsü, mapang telatet ka nung inyakba ken o tem tezübaba kümdaktsütsü/ Ministry of Home Affairs (MHA) Model Rules, 2020 dak ajemdaker PSARA license yanglushitsü atema yangluogo.

MNF & ZPM na BJP agent ama inyaksangshir: Kharge



ajangzükdaktsütsü atema tribal tem idang ali aser aremtem agitsü meranger," ta Kharge-i ashi.

Paisa, "Mizoram nung aliba nüburtem yimjiyimjung nung alitsü temeden lir," ta ashi.

Mallikarjun Kharge-isa, Congress party-i jenjang tapet agiba ajanga Mizoram yimjung nung lir ta ashi.

"1986 küm Peace Accord k ajanga Rajiv Gandhi-i Mizoram nem yimjung bener arutsü aser 1987 küm statehood ngua liasü," ta pai ashi.

Paisa, "Mizoram terenlok asoshi Congress party-i bendanga agüja inyaka aruogo," ta ashi.

Mizoram nung election magi tsüngda Congress party-i tenangzükba agütsüba dak sendakba nung Mallikarjun Kharge-i, "onoki kechi nangzük aji ataloktsütsü," ta ashi.

"State atema onoki kechi nangzükogo, iba ajanga Mizoram renloka aotsü," ta Kharge-i ashi.

Aizawl, Yimpoksüi/ November 2 (Agencies): Congress tir Mallikarjun Kharge, Mizoram nung ruling Mizo National Front (MNF) aser opposition Zoram People's Movement (ZPM) na BJP indang "unofficial agents" ama inyaksangshiba atema aitsüo.

"MNF aser ZPM na ya BJP indang unofficial agents ama inyaksangshir," ta Congress tir

Mallikarjun Kharge-i Brehostibarnü ashi.

Khrista dak amanger timba aliba state Mizoram nung parnok inyakyim atsülanga aotsü meranga aliba BJP party anema jembiba mapang Congress tir-i iba olen lemsatepa liasü.

"BJP-RSS na diversity anema lir aser parnoki parnok nem teyari agütsürtem

Kechiba Congress atema Akbar ya kanga tongtibang: Assam CM

Raipur, Yimpoksüi/ November 2 (Agencies): Assam chief minister aser BJP lenir tejen Himanta Biswa Sarma-i, Congress party-i tashishiba benokba dak ajemdaker election commission-i pa nem notice ka agütsüba indang maneni jembio.

Assam CM Himanta Biswa Sarma, shiba election atema nüboyimba sentong nung shilem agitsü atema Brehostibarnü Chhattisgarh nung Raipur tonga jembiba mapang "ni Akbar indang jembiba mapang Congress-i tashishiba agütsür," ta ashi.

"Ni TS Singh Deo mesüra Baghel mesüra tanga Congress lenirtem anema jembiba atema

tashishiba agütsü asübo angatetla," ta Sarma-i ashi.

Assam chief minister-isa, "Chhattisgarh Congress atema Akbar ya Bhupesh Baghel den tongtibangba. Akbar ya Congress atema kechiba ida tongtibang?" ta ashi.

Temetetsü kaji tawa Chhattisgarh nung nüboyimba sentong nung shilem agiba mapang model code of conduct (MCC) nung aibelenba atema election commission of India (ECI)-i Assam CM Himanta Biswa Sarma nem show cause notice ka agüja liasü.

Sarma-i Congress candidate Mohammad Akbar anema jembiba ya kin dak ajemdaker jembiba lir ta Congress party-i ashishiba sülen notice ya agüja

liasü.

Ojembiba mapang Sarma-i, "Akbar ka tesem kati arura pai Akbar 100 ajar. Anungji pa takokba tashi takaratiba nung yokang ajita mesüra Mata Kaushalya lima ya menentsü," ta ashi.

Assam CM-isa, Congress-i Chhattisgarh nung CM Bhupesh Baghel tenung banner aser poster tem nung agintsü atema telemtetba agiogo, ta ashi.

"Ni Congress nung küm22 inyakago anungji ni party telung osang angazüker. Election tembangba sülen Congress-i Baghel agintsü. Pa election temli mesüra tanem tanemi agintsü," ta Assam chief minister-i ashi.

# Boko Haram teloki Nigeria nung nisung 37 tepset

**Abuja, Yimpoksüi/Nov. 02 (Agencies):** Nigeria northeast tsütsü jihadists temi tepsetba nisung kar astüpila sentong nung dener meyipa aodang Islamist telok Boko Haram ajanga mangyimer nisung 20 tepset.

Yobe state nung telungpur temi yuja aliba tapoktsü oset nung menünga sülen mangyimer temya asü.

Hombarnü telungpur temi Gurokayeya yimtsüing amakdang nisung 17 khaseta liasü.

Yimdaklir temi 'harvest tax' agütsütsü memolungba yong Boko Haram temi iba lendong ya agütsü, ta police temi ashir.

Telungpur temi parnok inyakyim yaritsü aser nübürtem madak yimsü asütsü mechi Nigeria northeast tsütsü nübürtem dang senotsü meshir ta tai tongloktür.

"Boko Haram temi lendong

tesashi agütsüba rongnung ibai ka liasü. Pei meima aliba kinungertem sür mapang tatsüka sülen mangyimer tem asüba ya kangasa tetsübotsü aser tejashitsü mapa lir," ta iba tesem nung alir Idris Geidam-i ashir.

Mangyimer telok nungi nisung ter iba lendong atalokba tesem nung asü aser ano nisung ter mozü kidangi anir aoba sülen asü, ta Yobe police odongtar Dungus Abdulkarim-i ashir.

Iba lendong ya Mongulbarnü atalok, koba Gurokayeya yimtsüing amakba sülen anogo ka lir ataloker alitsü.

Yobe nung küm ka dak tema lir Boko Haram temi lendong tesashi agütsüba rongnung ibai mezüingbuba alitsü.

Telungpur tem ya anasa Borno state nungi arü südi ta amanger, kong Boko Haram temi taküm civilian dak aiben

lendong agüja aru ta state ketdangsur temi ashir.

Boko Haram poktetba Borno ya tang tashi lendong aliba tesem ka ama züingshir.

Parnoki 2009 küm nungi telungpur mapa tamajung inyaka nisung million ana dak tema pei ki yutsür tesem balala nung prokshia lir ta teyari agütsüba lokti tentet balalai ashir.

Iba telungpur telok ya kidanger Niger, Chad aser Cameroon linüktem tashinung oa lir aser sorkar meyong sepaitemi parnok makoker.

Boko Haram tetetzü "Western education is forbidden" aser iba region nung par Islamic yimsüsüba benoktsü meranga kaket reju aika maka arur.

Parnoki 2014 küm Chibok jila nungi school tanur tetsür 200 dak tema pua bener aoba sülen alimai iba telok ya meteta akum.

# Russia-i ghonda 24 nung nisung aliba tesem 100 amak: Ukraine

**Kyiv, Yimpoksüi/Nov. 02 (Agencies):** Ukraine indang interior minister-i ashiba agi, ghonda 24 tsüingta settlements 100 dak tema amak ta ashir, koba Russia nungeri taküm injang tulu aser bomb khaloktsüba tesashitiba alitsü.

Russia-i linük anüdoklen ymtitem nung shells million aika khaloktsü, ta Ukraine Interior Minister Igoe Klymenko-i ashir.

"Tesüiba ghonda 24 tsüingta tsükchirtemi region 10 nung aliba settlements 118 nung bomb khaloktsü," ta Klymenko-i Bodhbarnü ashir.

"Küm tenzüker yimti aser yimtsüing timtiba nung amakba

ibai alitsü," ta pai ashir.

Russia nungeri amakba ajanga Ukraine nung jila aser yimtsüing kar aoyi kumogo. Yasüing Russia den arütsü anasa Kharkiv yimti nung bomb khaloktsüdang nisung ka asü aser southeastern Kherson nunga ka asü, ta ashir.

Ukraine south tsütsü Nikopol yimti nung Russia nunger drone kati amakdang arishi küm 59 tain tetsür ka asü aser pezü yiru.

Kremenchuk nung oil refinery ka nung Russia nungeri amakdang mi adoka remseptsü mapang talangka agi saka asü-amaba meliasü, ta Kyiv ajanga ashir.

Asükwa arudang Russia-i Ukraine indang energy infrastructure nung tenük yoker amaktsü akok, ta Ukraine aser United States ama anüolen linüktemi khuret abener.

Iba rara tashi maitba akumer aser ozü nükjilding ataloktsü asoshi onoki technology tasen aser army reserves aika nüngdaktüsü, ta Ukrainian top general Valery Zaluzhny-i shia liasü.

Kanga yongya aliba Ukraine nungeri meyiper rara aodang alinük aika tanaben rakzüktettsü ta Ukraine bhukumba anüolen linüktem teimla lir, saka Zaluzhny-ibo tajangzük kangabo malitsü ta ashir.

# Biden-i Gaza nung Israel rara anena atatsü ayongzük

**Washington, Yimpoksüi/Nov. 02 (agencies):** Tesem ajungalen sapanga aliba Palestinian enclave nungi America nungeri ajunga anizüker aotsü merangba mapang US Tir Joe Biden-i Gaza nung Israel rara anena atatsü bhukuma jembi.

"Rara anena atatsü nüngdak ama bilemer," ta Biden-i Bodhbarnü nübuyim sentong ka nung ashir, kong longkak aiter kati tekeraba nung ceasefire alitsü ajungshia liasü.

Anena atatsü ta asüba tetetzü kechi ta asüingdang dang, "tepuokdak alirtem anitetsü mapang tongogo," ta Hamas teloki pua aliba athishia ashir.

Israel-i military operations agiba nung US-i totuyuba magütsütsü, ta White House-i taoba mapang shir lia tang US tiri iba o ya jembizüka yok.

"Onoki Israel asoshi 'red lines' meyanglur. Onoki maneni parnok yaritsü," ta White House odongtar John Kirby-i

taoba hopta shia liasü.

Hokulbarnü General Assembly nung ceasefire asoshi pangzük ka yanglutsü merangba nung linük 14-i memolungba rongnung US ya liasü.

Tang tashi US ya Israel asoshi tembar tajungtiba lir aser küm shia sen dollar billion aika jenjang teyari yoker. Tang Israel-i Hamas den raraba nung yaritsü aoshi Biden-i Congress dang sen billion \$14.3 jenjang military aid melatsü asüingdanga liasü.

Jabalia refugee camp nung Israel-i bomb pokloktüsüba mapang nisung 29 tepset aser aika yiru aser ibai Jabalia refugee camp nung tasemben amakba alitsü.

Israel sepaitemi camp nung aliba school ka nung missiles khalokja nisung 27 asü aser aika yiru, ta Palestinian Wafa news agency nungi osangbener kati ashir. Camp nung ano Israel nungeri gari ka amakdang nisung ana tepset ta pai ashir.

Tanü iba school nung Israel-i anaben amaker alitsü.

Israel sepaitemi Gaza City anüolen al-Shati refugee camp nung UNRWA meyong ali-Shati refugee camp nung school ka nung bomb poklokja liasü. Iba mapang nisung pongu asü.

Israel army temi occupied West Bank nung nisung 49 apu ta ashir.

Pua alir nisung 21 Hamas züingsemtem liasü. Hebron nung temesepba mozü shibelener tem aputsü operation agiba mapang telungpur züingsem 12 apu, ta mitkar temi ashir.

Beitunia, Ramallah aser al-Bireh nung Israel sepaitem dak tapoktsü oset aser long mereploktüsü ta ashir.

Qalqilya nung Israel sepaitem aser telungpurtem tsüingta khatempa liasü ta ashir.

Rara tenzüka sülen occupied West Bank nung nisung 1,220 dak tema puogo aser item rongnung nisung 740 Hamas züingsemtem lir.

## OFFICE OF THE AO STUDENTS' UNION CHUCHUYIMLANG TOWN

MOKOKCHUNG, NAGALAND

### TENÜNGSANG AGÜTSÜR



**Wabong Tiakumzuk Pongen, Wb.** Kenyangerba aser Wt. Akala jabaso, NPSC ajanga CTSE Engineering Services, 2023, tatitang agiba nung Demonstrator (Electrical Shop) under Higher & Technical Education Dept. nung tematiba takok jenjang nguteta, Ao Students' Union, Chuchuyimlang Town, nem konang nüingsang bener arutsüba atema kanga nematanga, pa nem tenüingsang agütsür.

Takoksang Tsüingremi maneni tarutsü nunga pa maparen ajak nung takok ngudakjang aser anema yujang ta ASUCT-i sarasademtsür.

## Ungma Watsü Telen-i Tenüingsang Agütsür

Asen Ungma Watsü Telen ajanga Wb. Imtiangshi Lkr aser Wt. Temsujungla (Kohima) na jala **Kr. Pusuzenla Longkumer, SDO (Civils) Works & Housing Department NPSC CTSE Engg Services 2023** nung takok tulu anguba atema tenüingsang agütsür. Tarutsü anogotem nunga na atema temoatsü meshitsür aser wadang tasen tenzüka aodang Tsüingremi nü taküm maneni len aniang ta sarasademtsür.

Sd/-  
Wt. Apokla  
Tir, UWT

Sd/-  
Wt. Atila  
Tongti Tezülur, UWT.

## OFFICE OF THE RIONGSANGER PUTU MENDEN YIMJENKIMONG

(Yimjenkimong Village Council)

HQ-Alongkima, Dist. Mokokchung: Nagaland

### KHONANG ASER TETUSHI AGÜTSÜR

Yimjenkimong senso züingsem tajung Mr. Noktiensha Imsong S/o Mr. Senti Imsong-i SDO (civil) Class 1 Gazetted under work & Housing Department nung takok tajung nguteta sensosanger ajak nem khonang nungsang bener arutsü nung Yimjenkimong Riongsanger putu ajanga peleba den khonang aser tetushi tolu agutsür. Tsüingremi asen lenir Taküm tarutsü anogotem ajak nung maneni Pa tematiba shisatsü aser taochi agi pa wadang ajak nung takokleni aniangma.

Sd/-  
Mr. C. Imo Walling  
Chairman, Yimjenkimong Village Council

Sd/-  
Mr. M. Onen  
Secretary YVC

## Pakistan general elections February 11 nung agitsü: ECP

**Islamabad, Yimpoksüi/Nov. 02 (Agencies):**

Kanga yongya ataba general election ya taruba küb February 11 nung agitsü, ta Election Commission of Pakistan (ECP) ajanga Supreme Court dang Brehostibarnü ashir. National Assembly aser provincial legislatures anener anogo 90 tsüingta election agitsü asü masü ta atsütepa aruba mapang iba osang ya angazüker.

ECP indang counsel Sajeel Swati-i constituency yangluba maparen January 29 nung renemtsü aser election agitsü lenmang lapoktsütsü ta ashir.

Supreme Court Bar Association (SCBA), the Pakistan Tehreek-e-Insaf (PTI), Munir Ahmad, aser Ibad-ur-Rehman densema telok balalai petitions agüja aliba Supreme Court ajanga benoka ken o jembidang iba sentong ya temai adok.

Taoba mapang court ajanga ECP aser federal government dang election anogo 90 tsüingta agitsü asoshi pei tebilemba lemsateptsü shia liasü. Nisung ajaki elections aginer, ta Chief

Justice of Pakistan (CJP), Qazi Faez Isa-i ashir.

Iba ken o jembidang, election ya anogo 90 tsüingta agitsüla ta PTI lawyer Barrister Ali Zafar-i ashir. Ajisüaka CJP Isa-i ibaji meinyaktettsü ta ashir. Election agitsü mapang atsülangba ajanga fundamental rights nung aibelener, ta Zafar-i ashir.

PTI ajanga shimtetba Palistan tiri election ya November 6 nü agitsü onük benoka liasü, saka election agitsü anogo sangdongtsü asoshi tir masü ECP dak tashi lir ta Ministry of Law and Justice ajanga jangjashitsü.

Linük nung court tulutiba ya tang iba mangatettep bentettsü mapa lir aser election anogo latettsü asoshi tir aser ECP shilem asadanger.

Constituency tem lemsashitsü aliba mechi election agitsü menur ta ECP ajanga ashir. Iba telemtetba nung political party kari molunger aser kari memolunger, kari tzüingsang majungtsü ashir aser kari election tangsa agitsü akhanger.

# MDFA Trophy 2023 tanü final asayatsü



Mokokchung District Football Veterans aser Dimapur Ao Football Veterans pur külemi tangokba noksa nung angur.

**Mokokchung, November/ Yimpoksüi 02 (TYO):** Mokokchung District Football Association (MDFA) Trophy 2023 League Match nungi Semi Final tashi asaya arur kelen tanü asayatem anisüngzükba anogo MDFA-i sentong tajung ka ayonga Mokokchung District Football Veterans (MDFV) aser Dimapur Ao Football

Veterans(DAFV) tsünda match ka asaya aser iba asaya nung MDFV-i goal 5-2 agi DAFV akok. Tanabuba asaya ano Mokokchung District Football Association (MDFA) -11 Deputy Commissioner(DC)-11 tsünda asaya aser iba asaya nung MDFA -11 goal-2 aser DC-11 goal-2 ta agütsütetepa asaya kasasa nung tembanga

liasü. Asüng November 3 nü MDFA Trophy 2023 Final Moanungsang MSC aser Telongjem FC tsünda nikongdang 1:00 Ako nungi tenzüka asayatsü aser iba sentong nung Chief Match Patron Advisor for Information & Public Relations, Soil & Water Conservation Wb. Imkong L. Imchen alitsü.

# ICC ODI bowlers rankings nung Shaheen Afridi temaba jenjangi tuogo

**New Delhi, Yimpoksüi/ November 2 (Agencies):** Pakistan nunger nüngtugu fast bowler Shaheen Afridi 50-over format bowler tem rongnung No.1 asayar kümogo. Pakistan team pur tang asaya aliba World Cup nung pai kanga tongtibang shilem agia arudar.

kanga tongtibang liasü aser iba ajanga par team semifinal-i aitsü timla agütsüogo. Kasa mapang nung Australia nunger Josh Hazlewood (second), India nunger Mohammed Siraj (third) aser South Africa nunger Keshav Maharaj (fourth) nunger ajak jenjang kaka asepzüka luogo. Spinner Kuldeep Yadav (seventh) aser Mujeeb Ur Rahman (eighth) naprongla jenjang anana tejakdangi tua top 10 nung lir.

nung alisang Shubman Gill-ia World Cup nung tang tashi nung run 104 dang yangluteta pa majangeti lir, ajisüaka pa tanem tanemi tejakdangi tudar. Australia nunger opener David Warner jenjang ka tejakdangi tua tang pezübuba nung lir aser kasa mapang nung India captain Rohit Sharma jenjang asem tejakdangi tua tang pongububa tongtetogo.

Ajaki imlaba ama Pakistan pur World Cup asaya nung Afridi-i kanga junga asaya arudar aser Bangladesh den asayaba mapang wicket asem agiba sülen pa Australia nunger spinner Adam Zampa den külemi iba asayamung nung wicket timtiba agiba asayar kümogo. Tenapronglai wicket 16 agir lir. Maneni Bangladesh den asayaba mapang wicket asem agiba ajanga pa temaba jenjangi tuogo.

Afridi pa indang career nung tang mezüngbuba No.1 asayar kümogo. ODI batting rankings nung Pakistan captain Babar Azam rating point ana agi temaba jenjang nung lir. Bangladesh den asayaba mapang pai run teku dang yanglutetba ajanga pa atsüngzükogo.

Batter tem rongnung Netherlands skipper Scott Edwards-a jenjang 11 tejakdangi tua tang 16buba nung lir. All-rounder rankings nung Bangladesh captain Shakib Al Hasan maneni temaba jenjang nung lir aser South Africa left- armer Marco Jansen jenjang ana tejakdangi tua tang tekububa nung lir. New Zealand nunger asayar Rachin Ravindra-a jenjang 14 tejakdangi tua tang 17buba tongtetogo.

Mongolbarnü Kolkata nung Bangladesh team akokba asaya nung pai wicket asem agiba ya

Pa sülen tanabuba jenjang



Straightway Higher Secondary School, Mokokchung pur saisapong mung 12 Assam Rifles ground nung akadang tangokba noksa nung angur. Iba asayamung ya Nov 3 tashi asayatsü. Fazl Ali College nung tetayur Mesütoba Ao iba sentong nung tetushi tejaoker liasü.

# Capt Kenguruse Memorial Trophy: Liangmai FC & Western Sumi SA nati takok angu

**Kohima, Yimpoksüi/ November 2 (TYO):** Indira Gandhi Stadium, Kohima nung tang asaya aliba Late Capt N Kenguruse, MVC Memorial Football Tournament nung Brehostibarnü Liangmai Football Club aser Western Sumi Sports Association nati pei tata asaya kokogo.

parnoki asaya akok. Brehostibarnü tanabuba asaya Western Sumi Sports Association-i goal 4-3 agi Viswemi FC kokogo. Asaya tenzüker minute pongbuba nung Haileuyibe-i WSSA atema mezüngbuba goal idaktsü saka minute ka tsünda Zapokhoto-ia Viswemi atema goal ka idaktsü. Iba sülen minute 13buba nung Viswemi atema Vilone-i tanabuba goal idaktsü saka maneni WSSA atema Mughahuto-ia tanabuba goal idakja asaya mezüngbuba shilem goal 2-2 nung tembang.

Iba asayamung ya Assam Rifles-i ayongzüka asayadar.

Asaya tanabuba shilem nunga Viswemi nungi asayar Vilone-i par team atema tasembuba goal idakja parnok tejakdang aküm saka mapang apuloktsür asayaba mapang parnoki Homuka aser Haileuyibe na menokdangteti tenati goal kaka idakja WSSA-i goal 4-3 agi asaya akok.

Brehostibarnü mezüngbuba asaya Liangmai FC aser taoba küm tasembuba jenjang nung tembangba Head Hunters team na kanga toktepa asayaba sülen Liangmai FC-i goal 2-1 agi kokogo.

Iba sülen telok ana tsünda kanga toktepa asaya arur asaya tanabuba shilem nung Weliso-i minute 69buba nung Liangmai atema tanabuba goal idakja

Asaya nung mezüngbuba goal ya Liangmai FC nungi asayar Yhunshalo Kemp-i minute 21buba nung idakja liasü, ajisüaka mapang tatsüka dang lir minute 33buba Thanlenhao-i Head Hunters atema goal ka idakja telok anaprongla goal kasasa aküm.

- November 3 nü asaya:**
1. Medziphema Royal FC vs New Agers FC @ 8AM
  2. Tehok FC vs Chang Sports Association @ 1PM.

# Ons-i la senpet shilem ka Palestine nunger nem agütsütsü nangzük

**Yimpoksüi/November 2, 2023 (Agencies):** Bodhbarnü Marketa Vondrousova akokba sülen Ons Jabeur-i ashiba agi, lai la indang WTA Finals senpet shilem ka Palestine nungertem nem tenla agütsütsü ta nangzükogo.

mepelateter. Kü dang tai tokang iba ya tennis indang asütsüla saka anogoshi video tem anguba ya kanga tezüdangtsüka lir.

Cancun nung season-ending championships nung mezüngbuba takok anguba sülen Tunisia tsür Jabeur court nung o jembiba mapang temulung raksaba ajanga o mejembiteti liasü.

"Iba ya political osang ka masü saka meimchir temeden dak sendaka lir. Ni alima nung yimjung aginer, aji dang," ta Jabeur-i ashi.

"Iba asaya akokba atema kanga pelar, saka ni tawa pela meliteter," ta lai ashi.

Post-match press conference nung jembiba mapang arishi küm 29 tain asayar yagi ashiba agi, la tennis nung rangloker masayateti arudar.

"Alima nung tensa ajanga ni mepeladaktsür," ta Jabeur-i ashi, shiba nüktzü ayimba ajanga o mejembiteti liasü. Iba sülen la Israel-Hamas rara indang jembiba liasü.

"Ni social media nungi takok tashi pila alitsü meranger saka kanga tasak," ta Jabeur-i ashi.

"Tanur aser kinütanurtem anogoshia timtem nung aliba anguba ya kanga tasak lir," ta Ons-i ashi.

"Video aser noksatem reprangra kanga majung. Iba ajanga ni amoa meyoker aser kanga junga recover mesüteter aser ajak dang tamajugntibaji ni kecha minyakteter.

"Iba ya ngua kanga temulung raksar, anungji ni kü senpet shilem ka Palestine nunger yaritsü atema tenla agütsütsü telemtetba agiogo," ta lai ashi.

"Sen tera tenla agütsüba ajanga terabo teyari agütsütsü imlar. Ajisüaka tang parnok atema sen ya kecha nüngdaka mali ta ni meteta lir. Anungji ni ajak asoshi nüjiso aser yimjung atema imla atar," ta laisa shisem.

"Alima nung tatalokbatem kodang bilemdangshir iba mapang ni iba asaya kokaka

Semi-finals atema qualify asütsü asoshi round-robin asaya tatembangbuba nung Jabeur-i Hokolbarnü world number two Iga Swiatek akoktsü nüngdaker.

**BILEMDANGANG**  
"Asenoki rara metembangdaksüra rarai asenok tembangdaksütsü."